

आकाशवाणी जयपुर-अजमेर
प्रादेशिक समाचार ।

- प्रदेश रा आकांक्षी जिलां अर ब्लॉक्स मांय आज सम्पूर्णता अभियान सरू व्हयो-स्वास्थ्य, पोषण, शिक्षा, खेती-बाड़ी अर सामाजिक विकास समेत छह सूचकांकां ऊं जुड़्या मुद्दा माथे खास ध्यान ।
- कृषि अर ग्रामीण विकास मंत्री डॉ किरोड़ीलाल मीणा इस्तीफो दीनो ।
- हज रा मुकद्दस सफर ऊं हाजियां रे पाछा आवण रो सिलसिलो सरू व्हयो-जेद्दाह ऊं पहली उड़ान आज जयपुर पूगी ।
- पूरा प्रदेश मांय चौमासा री बिरखा-लारला 24 घंटां मांय जयपुर अर अलवर समेत केई ठोडां जोरदार बिरखा ।

0000

प्रदेश रा आकांक्षी जिलां अर ब्लॉक्स मांय आज सम्पूर्णता अभियान सरू करी ज्यो । ई रा तैत स्वास्थ्य, पोषण, शिक्षा, कृषि, सामाजिक विकास अर मिट्टी री उपज देवण री ताकत बधावण ऊं जुड़्या छह मुद्दां माथे खास ध्यान दियो जा रह्यो है । अभियान री सरूआत रे मौके आज डूंगरपुर जिला मांय झोथरी ब्लॉक रा गैंजी री सरकारी सीनियर सैकेण्डरी स्कूल मांय खास कार्यक्रम राख्यी ज्यो । इण मांय सांसद राजकुमार रोट, राज्य रा पैली वाळा मंत्री सुशील कटारा, जिला कलेक्टर अंकित कुमार सिंह, नीति आयोग रा नुमाइंदा मेथुकु अनिरुद्ध, स्कूल रा विद्यार्थी अर गांव वाळा मौजूद हा । जिला कलेक्टर बतायो के केंद्र सरकार देश मांय घणा पिछड़्या जिलां अर प्रखंडां मांय सेवा वितरण अर शासन स्तर मांय सुधार रा मकसद ऊं संपूर्णता अभियान चलायो है, जिण मांय डूंगरपुर जिला रा झोथरी ब्लॉक ने ई चुणी ज्यो है ।

बीकानेर जिला रा कोलायत मांय राख्यी ज्या कार्यक्रम मांय जिला कलेक्टर नम्रता वृष्णि कह्यो के नीति आयोग कानी ऊं चलायी ज्या ई आकांक्षी ब्लॉक कार्यक्रम मांय जिला रा कोलायत ने चुणी ज्यो है । वे कह्यो के तीन महीना मांय नीति आयोग कानी ऊं तय करी ज्या न्यारा-न्यारा सूचकांकां ऊं जुड़ी सौ फीसदी कामयाबी हासिल करणो तय कर्यो जावेला ।

नीति आयोग रा उप सलाहकार मनोज कुमार उपाध्याय कह्यो के संपूर्णता अभियान रो मकसद छह सूचकांकां रा हिसाब ऊं पिछड़्या जिलां अर ब्लॉक ने मुख्य धारा ऊं जोड़बो है । कार्यक्रम ऊं पैली जिला कलेक्टर हरी झंडी बता र संपूर्णता अभियान जागरूकता यात्रा

ने अंबेडकर सर्किल ऊं रवाना कीनी। ई मौके लगायी ज्यी प्रदर्शनी मांय चिकित्सा, महिला अर बाल विकास, प्लान इंडिया, कृषि अर राजीविका समेत न्यारा—न्यारा महकमां री स्टॉल्स लगायी ज्यी अर संपूर्णता अभियान ऊं जुड़ी न्हानी फिल्म बतायी ज्यी। **कोटपूतली—बहरोड़** ज़िला रा नीमराना मांय जिला कलेक्टर कल्पना अग्रवाल पौधो रोप र संपूर्णता अभियान री सरूआत कीनी। संपूर्णता अभियान रा तहत कोटपूतली— बहरोड़ ज़िला अर नीमराना प्रखंड ने आकांक्षी ज़िला अर प्रखंड चुणी ज्या है। **सिरोही** जिला रा आबूरोड ब्लॉक मांय ई आज संपूर्णता अभियान सरू करी ज्यो।

ई मौके राख्यी ज्या कार्यक्रम मांय ब्लॉक स्तर रा अहलकार अर गांव वाळां री मौजूदगी मांय शिक्षा, स्वास्थ्य, पोषण, खेती—बाड़ी, टीकाकरण अर सामाजिक विकास ऊं जुड़्या मुद्दां माथे चर्चा करी ज्यी। **गंगापुरसिटी** मांय ई आज ई अभियान री सरूआत करी ज्यी।

00000

विधानसभा रा बजट सत्र रा दूजा दिन आज ई सदन मांय विपख रा सदस्य प्रश्नकाल अर शून्यकाल मांय जोरदार हंगामो कीनो। प्रश्नकाल रे दौरान शिक्षा मंत्री मदन दिलावर ज्यों ही एक सवाल रो जवाब देवण लाग्या, विपख रा सदस्य आदिवासियां रा बारा मांय वां रा बयान माथे माफ़ी मांगण री मांग करता थकां वेल मांय आ र नारा लगावण लाग्या। दिलावर रा इस्तीफा री मांग करता थकां विपख रा सदस्य सदन ऊं बाहर निकळ ग्या। शून्यकाल मांय कांग्रेस रा विधायक हरिमोहन शर्मा वां री पार्टी रा विधायकां रे खिलाफ दर्ज कर्या जा रह्या मुकदमां रो मुद्दो उठायो। वे सरकार अर प्रशासन माथे संविधान रे जरिये दिया ज्या लोकतांत्रिक हकां माथे चोट करण रो आरोप मांड्यो। विधायक हरिमोहन शर्मा कह्यो के कोटा मांय सदन मांय विपख रा नेता अर कांग्रेस रा प्रदेश अध्यक्ष समेत पार्टी रा न्यारा—न्यारा नेतावां रे खिलाफ मामला दर्ज करी ज्या है।

00000

गौपालन मंत्री जोराराम कुमावत आज विधानसभा मांय बतायो के नियमां रा तैत अर्जियां मिलण परां पंचायत स्तर माथे गौशालावां अर नंदी शालावां खोली जावेला। वे प्रश्नकाल रे दौरान पूछी ज्या पूरक सवाल रा जवाब मांय आ जाणकारी दीनी। कुमावत बतायो के मोटा गौवंश सारू 40 रूप्या अर न्हाना गौवंश सारू बीस रूप्या रोजीना री रेट ऊं 270 दिन ताई मदद री रकम देवण रो प्रावधान हैं।

00000

प्रदेश रा कृषि अर ग्रामीण विकास मंत्री डॉ किरोड़ीलाल मीणा इस्तीफो दे दीनो है हालांकि वां रो इस्तीफो मंजूर नी करी ज्यो है। वे एक धार्मिक कार्यक्रम पाछे खबरनवीसां सागे बातचीत करता थकां आ जाणकारी दीनी।

मीणा कह्यो के वे संगठन या मुख्यमंत्री ऊं नाराज नी है पण दौसा, टोंक—सवाईमाधोपुर अर करौली मांय पार्टी री हार ऊं दुःखी है। ध्यानजोग है के डॉ. मीणा लोकसभा चुनाव रे दौरान वां री जिम्मेदारी वाळी सीटां माथे पार्टी री हार रा हालात मांय इस्तीफो देवण रो ऐलाण कीनो हो। ई बीचे मुख्यमंत्री भजनलाल शर्मा विधानसभा मांय डॉ किरोड़ीलाल मीणा रा महकमा ऊं जुड़्या सवालां रा जवाब देवण री जिम्मेदारी दूजा मंत्रियां ने दीनी हैं। ग्रामीण विकास अर आपदा प्रबंधन विभाग ऊं जुड़्या सवालां रा जवाब मंत्री ओटाराम देवासी जदके कृषि अर उद्यानिकी महकमा ऊं जुड़्या सवालां रा जवाब मंत्री के.के. विश्नोई देवेला।

00000

हनुमानगढ़ जिला री टिब्बी तहसील रा रामपुरा गांव रा मेजर विकास भाम्भू ने मर्यां पाछे राष्ट्रपति द्रौपदी मुर्मू काल शौर्य चक्र ऊं नवाजेला। मेजर विकास भाम्भू फौज मांय सेवा रे

दौरान 21 अक्टूबर 2022 ने अरुणाचल प्रदेश मांय देश सारू जान निछावर कर दीनी ही। इण ऊं पैली वां ने "सेना मेडल" ऊं नवाजी ज्या हा। काल व्हेवण वाळा कार्यक्रम मांय मेजर विकास भाम्भू रा बाप भागीरथ भाम्भू, मां सुखवंती देवी अर मेजर री वीरांगना शौर्य चक्र लेवेला।

000

हज रा मुकद्दस सफर ऊं हाजियां रे पाछा आवण रो सिलसिलो सरू व्हे ग्यो है। हाजियां री वापसी री पहली उड़ान आज जेद्दाह ऊं जयपुर आई। इण मांय 433 हाजी पाछा आया है। हाजियां री आखिरी उड़ान 11 जुलाई ने जयपुर आवेला। कुल 9 उड़ानां रे जरिये प्रदेश रा 3 हजार 680 हाजी पाछा आवेला।

000

प्रदेश मांय चौमासा री बिरखा और तेज व्हे गयी है। जयपुर समेत केई जिलां मांय संवारे ऊं ई बिरखा रो दौर चाल रह्यो है, ई कारण घणखर ठौड़ां पारो उतर्यो है। बिरखा रे कारण केई ठौड़ां पाणी भर ग्यो है। जयपुर मांय आज आखा दिन मेह बरस्यो। झुंझुनू मांय ई बरसात का दौर चालतो रह्यो। जिला रा न्यारा-न्यारा गांवां मांय हल्की ऊं मझला दर्जा री बिरखा व्ही। **सीकर** मांय ई जोरदार मेह बरस्यो। **कोटा** मांय ई जोरदार बायरा सागे बिरखा व्ही।

बांसवाड़ा ऊं ई बिरखा रा समाचार है। दूजी कानी **बारां** मांय उमस रे कारण लोगां ने घणी परेशानी व्ही। मौसम केंद्र जयपुर रे मुजब मॉनसून री ट्रफ लाइन बीकानेर-चुरु व्हे र निकळ रही है। राज्य रा उतराद ऊगणी हलकां माथे बण्या परिसंचरण तंत्र रे कारण प्रदेश रा ऊगणी जिलां मांय आवता दो-तीन दिन चौमासा री तेज बिरखा व्हेवण रा आसार है। ई दौरान जयपुर, भरतपुर, अजमेर, उदयपुर अर कोटा संभाग मांय केई ठौड़ां बिरखा री संभावना है। बीकानेर संभाग रा कुछ हलका मांय ई आवता 48 घंटां रे दौरान बिरखा व्हेवण रा आसार है हालांकि जोधपुर संभाग रा सरहदी हलकां मांय मौसम साफ रेहवण रा आसार है। ई बीचे **चित्तौड़गढ़** मांय व्हे रही बिरखा ने ध्यान राखता थकां किसान 8 दिन मांय मक्का अर सोयाबीन समेत न्यारी-न्यारी जिंसां री करीब 90 फीसदी बुआई कर दीनी है।

000

राज्य मांय मानसून रे दौरान मौसम विभाग कानी ऊं केई ठौड़ां भारी बारिश री चेतावनी ने ध्यान राखता थकां स्वायत शासन विभाग सगळा अहलकारां ने तैयारी अर सुरक्षा उपाय तैय करण रा हुकम दीना है। डीएलबी रा निदेशक सुरेश कुमार ओला कह्यो के सगळा अहलकारां ने आवता 72 घंटां मांय भारी बारिश रा आसार ने ध्यान राखता थकां सतर्क अर तैयार रेहवण बाबत् कही ज्यो है। वे कह्यो के नाळां रे आरे-सारे कर्मचारियां अर संसाधनां री उचित तैनाती करी जावणी चाहिजे। ओला बतायो के अहलकारां ने पाणी रो भराव रोकण अर शहरी हलकां मांय बाढ़ रो जोखिम कम करण सारू नाळां ने साफ राखण बाबत् करी ज्यो है। वे बतायो के अहलकारां ने स्थानीय निकायां मांय घणी जूनी इमारतां री पिछाण करण सारू सर्वे करण बाबत् कही ज्यो है।

000

सवाईमाधोपुर मांय व्ही 14 अर 17 साल ऊं कम उम्र री टाबरियां री संभाग स्तर री खो-खो होड़ आज पूरी व्हे गयी। केन्द्रीय विद्यालय अलवर री टीम लडका अर लडकियां रा फाइनल मुकाबला जीत र चैम्पियन बणी। 14 साल ऊं कम उम्र री टाबरियां रा वर्ग मांय

अलवर पीएम श्री केन्द्रीय विद्यालय सवाईमाधोपुर ने हरा र खिताब जीतयो। केन्द्रीय विद्यालय वायु सेवा स्थल जोधपुर क्रमांक-2 की टीम तीजी ठौड़ माथे रही। 17 साल ऊं कम उम्र री टाबरियां रा फाइनल मुकाबला मांय केन्द्रीय विद्यालय अलवर, केन्द्रीय विद्यालय नम्बर-6 ने परास्त कीनो। केन्द्रीय विद्यालय नसीराबाद री टीम तीजी ठौड़ माथे रही।

00000

सलूंबर रा जिला कलेक्टर महीना रा पहला गुरुवार ने आज जयसमंद पंचायत समिति री नेवातलाई ग्राम पंचायत मांय जन सुणवाई कीनी। ई दौरान खाद्य सुरक्षा योजना रो फायदो लेवण सारू नाम मंडावण, मौत रो सर्टिफिकेट जारी करण अर आधार कार्ड मांय नाम मांय बदलाव करावण समेत न्यारा-न्यारा मामला माथे विचार करी ज्यो। ई मौके ग्राम पंचायत मातासुला अर धोलिया ई वीडियो कांफ्रेंसिंग रे मार्फत जुड़ी। **झालावाड़** जिला मांय बकानी पंचायत समिति री करलगांव ग्राम पंचायत मांय जिला कलेक्टर अजय सिंह राठौड़ री सदरत मांय जनसुणवाई करी ज्यी। ई दौरान जिला कलेक्टर गांव वाळा री परेशानियां दूर करण सारू अहलकारां ने जरूरी हुकम दीना। **केकड़ी** री जिला कलेक्टर श्वेता चौहान टोडारायसिंह री मोर ग्राम पंचायत मांय जनसुणवाई कीनी। **बूंदी** रा जिला कलेक्टर अक्षय गोदारा गुढ़ानाथावतान मांय जनसुणवाई कीनी। **जैसलमेर** मांय जिला कलेक्टर प्रताप सिंह देवा ग्राम पंचायत मांय गांव वाळां री समस्यावां सुणी अर अहलकारां ने जरूरी हुकम दीना।

000

बारां मांय जिला प्रशासन अर शिक्षा विभाग री ओर ऊं 'हरियालो म्हारों बारां' महाअभियान रा तहत आज जागरुकता रैली निकाळी ज्यी। अभियान रा तैत जिला मांय करीब 18 लाख पौधा रोप्या जावेला।

00